

漢魏六朝百三家集

漢東

蔡中郎

第十六冊

EAST ASIAN LIBRARY
RM 8049 ROBARTS LIBRARY
UNIVERSITY OF TORONTO
TORONTO, CANADA M5S 1A5

V. 16

蔡中郎集卷之二

漢 陳畱蔡邕 著

明 太倉張溥 閱

箴

衣箴

今人務在奢嚴志好美飾帛必薄細衣必輕煖
或一朝之晏再三易衣私居移坐不因故服

延一博之是再三易本以故終坐不因故
今人修五答漢書秋美謝自以新賦太以神

太

太

太

太

太

銘

黃鉞銘

孝桓之季年鮮卑入塞盜起匈奴左部梁州叛
羗逼迫兵誅滎衍東夷高句麗翻子百固逆謀
並發三垂騷然爲國憂念西府表橋公昔在涼
州柔遠能邇不煩軍師而車師克定及在上谷
漢陽連在營郡膂力方剛明集士衆徵拜度遼
將軍始受旄鉞鉦鼓之任扞禦三垂公以吏士
頻年在外勤於犇命人馬疲羸撓鈍請且息州

營橫發之役，以補困憊，朝廷許之。於是儲廩豐饒，室罄不懸，人逸馬畜，弓勁矢利，而經用省息，官有餘資，執事無放散之尤，簿書有進入之贏，治兵示威，戎士踴躍，旌旗耀日，金鼓雷奮，守有山嶽之固，攻有必克之勢，羗戎授首于西疆，百固冰散于東鄰，鮮卑收迹，烽燧不舉，眎事三年，馬不帶缺，弓不受彊，是用鏤石作茲鉦鉞，軍鼓陳之東階，以昭公文武之勛焉。銘曰：

帝命將軍，秉茲黃鉞，威靈振耀，如火之烈，公之

在位羣狄斯柔齊斧罔設人士斯休

東鼎銘

維建甯三年秋八月丁丑延公于玉堂前廷乃
詔曰其以大鴻臚橋玄爲司空再拜稽首以讓
帝曰俞往哉三讓然後受命公乃虔恭夙夜帝
采勤施八方旁作穆穆以對揚天子丕顯休命
越在先民毗于天子罔不著其股肱畢其思心
式率天行式昭德音公亦克紹厥猷鑒于法罔
敢不法憲于誠罔敢不誠用總是羣后保乂帝

家勛在方冊民咸曰休哉惟帝念功越若來二月丁丑遷於司徒

中鼎銘

維建甯四年三月丁丑延公登于玉堂前廷乃制詔曰其以司空橋玄爲司徒公拜稽首以讓帝曰俞往哉三讓然後受命公允迪厥德宣力肆勤戰戰兢兢以役帝事率夫百辟媚于天子天子曰都慎厥身修思永同寅協恭以和天衷德則昭之違則塞之回乃不敢不弼枉乃不敢

不匡。股肱之事既充。三事之繇允備。災眚作見。乃引其責曰。凡庶徵不若。彝倫不叙。是惟臣之職。祇以疾告表。越十月庚午記此。

西鼎銘

維光和元年冬十二月丁巳。延公入崇德殿前。乃制詔曰。其以光祿大夫玄爲太尉。公拜稽首曰。臣聞之三讓。莫或克從。臣不敢辭。臣犬馬齒七十。可以生。可以死。其戮力閑私。悉心在公。以盡爲臣之節。于時侍從陞階。與聞公之昌言者。

莫不惕厲。如履薄冰。旣乃碑表百代。

朱公叔鼎銘

忠文朱公名穆字公叔有殷之胄微子啓以帝
乙元子周武王封諸宋以奉成湯之祀至元子
啟生公子朱其孫氏焉後自沛遷于南陽之宛
遂大於宋爵位相襲烈祖尚書令肅宗之世守
于臨淮考曰實爲陳畱太守乃及忠文克慎明
德以紹服祖禰之遺風悉心臣事用媚天子顯
允其勲績尋綜六藝契濶馳思所以啟前惑而

覺後疑者疊疊焉。雖商偃其猶病諸。初舉孝廉除郎中尚書侍郎。獨念運際存亡之要。乃陳五事。諫謀深切。退處畎畝。以察天象。驗應著焉。孝順晏駕。賊發江淮。時辟大將軍府。實掌其事。用拜宛陵令。非其好也。遂以疾辭。復辟大將軍。再拜博士。高第作侍御史。明司國憲。以齊百僚。矯枉董直。罔肯阿順。以黜其位。潛于郎中。羣公並表。乃遷議郎。登于東觀。纂業前史。于時冀州凶荒。年饑民匱。而貪婪之徒。乘之爲虐。錫命作牧。

靜其方隅、乃攄洪化、奮靈武、昭令德、塞羣違、貞
良者封植、殘戾者芟夷、去惡除盜、無俾比而作
慝、用陷于非辜、復徵拜議郎、病免官、徵拜尚書、
清一以考其素、正直以醇其德、出納帝命、乃無
不允、雖龍作納言、山甫喉舌、靡以尚之、享年六
十有四、漢皇二十一世、延熹六年夏四月乙巳
卒于官、天子痛悼、詔曰、尚書朱穆、立節忠亮、世
篤爾行、虔恪機任、守死善道、不幸而卒、朝廷憫
焉、今使權謁者中郎楊賁、贈穆益州刺史、印綬、

魂而有靈嘉其寵榮嗚呼哀哉肆其孤用作茲
寶鼎銘載休功俾後裔永用享祀以知其先之
德

胡太傅祠前銘

天鑒有漢山嶽降靈於肅文恭應期誕生好是
懿德柔惠且貞爰在初服皇嘉其聲納于機密
機密惟清守于三邦三邦事甯越尹三卿百揆
時序七受帝命作此元輔左右六世靖綏土宇
蠢彼羣生保賴亶叙紹跡龍夷繼軌山甫遭國

不造仍世短祚援立聖嗣得公之謨帝曰文恭
朕嘉君功爲邑安樂以祐其庸登位特進于異
羣公休命丕顯光寵克章公拜稽首是對是揚
藹藹惟公民斯攸望春秋旣暮倏爾乃喪不慙
是遺俾屏於皇新廟奕奕於以蒸嘗子子孫孫
承嗣無疆

京兆尹樊德雲銘

於顯哲尹誕德孔彰膺帝休命謂篤不忘爰納
忠式規悟聖皇欽崇園邑大孝允光允命車服

昭示采章、軒輶四牡、承祀蒸嘗、多士時貢、徭役
永息、道路孔夷、民清險棘、同體諸舊、兆氓蒙福
惠垂無疆、守以罔極、

樽銘

酒以成禮、弗愆以滂、德將無醉、過則荒沈、盈而
不冲、古人所箴、尚鑒茲器、懋勗厥心、

盤銘

華盤就用、以享嘉賓、內納其實、外若立真、

警枕銘

應龍蟠蟄潛德保靈制噐象物示有其形哲人
降鑒居安聞傾

碑

太尉橋公廟碑

橋氏之先出自黃帝。帝葬于橋山。子孫之紹基
立姓者。咸以爲氏。漢興。世以禮樂爲業。高祖諱
仁。位至大鴻臚。列名於儒林。祖侍中廣川相考
東萊太守公稟性貞純。幼有弘姿。剛而不虐。威
而不猛。聞仁必行。睹義斯居。文以典術。守以純
固。弱冠從政。當官而行。刺史周公辟舉從事。所
部二千石。受取有驗。公糾發贓罪。致之於理。時

有椒房桂戚之託。周公累息。公不爲之動。史魚之勁直。山甫之不阿。於是始形。舉孝廉。除郎中。洛陽左尉。特進。潁王梁不疑。爲河南尹。當事以對。是時畏其權寵。而爲屈辱者多矣。公不折節。解印綬去。辟司徒。舉高第。補侍御史。以詔書考司隸校尉趙邠事。廷尉郭貞私與公書。非接使銜命之宜。公封書以聞。貞以文章得用。鬼薪。公離司寇。辟大將軍梁公幕府。屢以救正。于其隆指將軍嘉之。無言不酬。又以高第補侍御史。在

職旬月、羗戎匪茹、震驚隴漢、西府舉公拜涼州
刺史、威名克宣、凶虜革心、清風席卷、至則無事
車師、後部阿羅多卑君相與爭國、與兵作亂、公
遣從事牛稱何傳舉輕騎奉辭責罪、收阿羅多
卑君繫燉煌、正處以聞、阿羅多爲王卑君侯稱
以奉使、副指除侯部不動干戈、揮鞭而定、西域
之事、人以爲笑談、又值饑荒、諸郡饑餒、公開倉
廩以貸救其命、主者以舊典宜先請、公曰、若先
請、民已死、廩訖、乃上之、詔報曰、邊穀不得妄出、

立擅出於是立有汲黯憂民之心後不以爲常
公達于事情剖斷不疑皆此類也遷齊相視民
如保赤子討惡若赴水火形明賞遂民知勸懼
臨淄令賂財贓多罪正受鞠就刑沒齒無怨竟
以不先請免官徵拜上谷太守民有父子俱行
凶人人惡言當道曉之不止其子殺人而捕得
公以其見悔辨直不舉文書以遇赦令蕃縣有
帝舜廟以故事齋祠戶曹史張機有懲罰貨祠
巫自託以舜命約公云不得譴公覺其奸態收

考首伏。卽日伏辜。遷漢陽太守。上邽令皇甫禎
賊罪明審。收考髡鉗。死于冀市。後以病去。徵拜
議郎。司徒長史。循王惺。桓帝同產。以懷逆謀。黜
封。瘞陶王。以公長於襟帶。拜鉅鹿太守。惺畏怖
明憲。檢于靜息。自將作大匠。徵未到。而章謗先
入。故轉拜議郎。遂用免官。徵度遼將軍。遷河南
尹。少府大鴻臚。司徒司空。託病而去。悉引衆災。
雖非已負。公皆以自劾遜位。歲餘。拜尚書令。時
河間相蓋升。以朝廷在藩國時。隣近舊恩。歷河

南太守太中大夫在郡受取數億以上，創毒深刻，公表升貪放狼籍，不顧天罔，損辱國家，爲上招怨，當肆市朝以謝兆民。幸遇贖令，罪除惡在可免，升官禁錮終身，沒八財賂，非法之物以充帑藏，懲戒羣下，連表上不納，而升遷爲侍中，公稱病辭，徙拜光祿大夫，復拜大尉如前，遜位復拜少府，病不就職，拜太中大夫。凡所獲祿皆公府所特表選，臨難受位，自九列之後，乃以丕貶。公紀綱張弛，勇決不回，是非明作，速於察機，燕

居從容、申申天天、和樂寬裕、愛士親仁、凡見公
容貌、聞公聲音、莫不熙怡悅懌、思樂模則、來者
忘歸、去者願還、雅性謙克、不吝於利欲、雖衆子
羣孫、並在仕次、曾無順媚一言之求、身沒之日、
無獲大位、在百里者、莫得好縣、比方公孫、未有
若茲者也、初公爲舍於舊里、弟卒、推與其孤、至
於卽世、柩殯無所、清儉仁與之効、於斯爲著、巍
巍乎若德允世之表儀也已、公諱立、字公祖、少
辟孝廉、辟司徒、大將軍府、爲侍御史、牧一州、典

五郡出將邊營入掌機密歷三卿同三司享年
七十五光和七年夏五月甲寅以太中大夫薨
于京師朝廷所以弔贈如前傳之儀九月乙酉
葬于某所三孤故臣門人相與述公言行咨度
禮制文德銘于三鼎武功勒于鉦鉞官簿次第
事之實錄書于碑陰俾爾昆裔永有仰于碑陰
云銘曰

光光烈考伊漢元公克明克哲實叡實聰如淵
之浚如嶽之嵩威壯虓虎文繁雕龍撫柔疆垂

戎狄率從、敷教中夏、五典攸通、帝謂我后、朕嘉
君功、命君三事、時亮天工、公拜稽首、翼翼惟恭
左右天子、祇厥勲庸、庶績旣熙、黎民時雍、上下
謐甯、八方和同、丕顯伊德、作憲萬邦、

太尉橋公碑

公諱立、字公祖、梁國睢陽人也、大鴻臚之曾孫、
廣州相之孫、東萊太守之元子也、膺受純性、誕
有特表、岐嶷而超等、總角而逸羣、至於初紳、高
明卓異、爲衆傑雄、其性疾華尚朴、有百折不撓

臨大節而不可奪之風、經藝傳記、周覽博涉、瑰
奇在前、靡所不識、當世是以服重器、歸高名、州
郡交請、待以訪斷、歷端首則義可行處、爪牙而
威以布、察孝廉、除郎中、洛陽左尉、以公事去、辟
司徒、舉高第侍御史、直道而往、用光其任、辟大
將軍西府、表拜涼州刺史、遷齊相、以公事去、詔
書郎綬、卽家拜上谷太守、遷漢陽太守、徵拜議
郎、司徒長史、鉅鹿太守、被詔書爲將作大匠、爲
受罰者所章、拜議郎、卽徵拜度遼將軍、遷河南

尹、少府大鴻臚、遂陟司空司徒、託痾遜位、起家
拜尚書令、以疾篤、請拜光祿大夫、後拜太尉、久
病自替、復爲少府太中大夫、春秋七十五、光和
七年五月甲寅薨、公性質直、不憚強禦、在憲臺
則有盡規之忠、領州郡則有虎眈之威、其拔賢
如旋流、討惡如霆擊、每所臨向、清風先翔、遠近
豫震、茲可謂超越衆庶、彰于遠邇者已、于是故
吏司徒博陵崔烈、廷尉河南吳整等、以爲至德
在已、揚之由人、苟不皦述、夫何考焉、乃共勒嘉

石、永昭芳烈、遂作頌曰

赫矣橋公、秉文握武、內爲宗幹、出爲藩輔、在憲
彈枉、竟由厥矩、允牧于涼、刈彼裔土、爰將度遼、
亦用齊斧、敷教四畿、旋統京宇、敦茲五服、衆庶
是與、膺踐七命、翼我哲聖、登空補袞、陟徒訓敬、
尹尉清宸、熙帝之政、終始爲貞、典章以定、遺愛
在民、皇哀其命、立石刊銘、莫遁斯聽、魂而有靈、
萬億其盛、

太傅文恭侯胡公碑

公諱廣字伯始交趾都尉之元子也公應天淑
靈履性貞固九德咸修百行畢備遭家不造童
而夙孤上奉繼親下慈弱弟崎嶇儉約之中以
盡孝友之道及至入學從訓歷觀古今生而知
之聞一覩十兼以周覽六經博總羣議旁貫憲
法通識國典年二十七察孝廉除郎中尚書侍
郎尚書左丞尚書僕射幹練機事綢繆樞極忠
亮唯允簡于帝心智畧周密冠于庶事遷濟陰
太守其爲政也寬裕足以容衆和柔足以安物

剛毅足以威暴，體仁足以勸俗，故禁不用刑，勸不用賞，其下望之如日月，從之如影響，思不可忘，度不可革，遺愛結于人心，超無窮而垂則，徵拜太司農，遂作司徒，遷太尉，以援立之功，封安樂鄉侯，錄尚書事，稱疾屢辭，策賜就第，復拜司空，功成身退，俾位特進，又拜太尉，復以特進，致命休神，又拜太尉，遜位歸爵，旋于舊土，徵拜太中大夫，尚書令，太僕，太常，司徒，永康之初，以定策元功，復封前邑，錄尚書事，疾病就第，又授太

傳入叅機衡、五蹈九列。七統三事。諒闇之際。三據冢宰。和神人于宗伯。理水土于下台。訓五品于司徒。耀三辰于上階。光弼六世。歷載三十。自漢興以來。鼎臣元輔。耄耋老成。勲被萬方。與國終始。未有若公者焉。春秋八十二。建甯五年三月壬戌。薨于位。天子悼惜。羣后傷懷。詔五官中郎將任崇奉冊。贈以太傅。安樂鄉侯。卹綬。拜室家子一人郎中。賜東園秘器。賜絲帛含歛之備。中謁者董詡弔祠護喪。錢布賻賜。率禮有加。賜

諡曰文恭、昭顯行迹、四月丁酉、塋于洛陽、故吏濟陰池喜、感公之義、率慕黃鳥之哀、推尋雅意、彷徨舊土、休績丕烈、宜宜于此、乃樹石作頌、用揚德音、詞曰

於皇上德、懿鑠孔純、大孝昭備、思順履信、膺期命世、保茲舊門、淵泉休茂、彪炳其文、爰贊天機、翼翼唯恭、夙夜出納、紹跡虞龍、賦政于外、神化玄通、普被汝南、越用熙雍、帝曰休哉、命公三事、乃耀柔嘉、式是百司、朕肱元首、庶績咸治、二氣

焚雍五徵來備、勲格皇天、澤洽后土、封建南藩、
受茲介祐、玉藻在冕、毳服艾輔、駱車雕駟、四牡
脩扈、贊事上帝、祇祀宗祖、陟降盈戲、與時消息、
旣明且哲、保身遺則、同軌旦奭、光充區域、生榮
死哀、流統罔極、

太傅胡公碑

維漢二十有一世、建甯五年春三月旣生魄、八
日壬戌、太傅安樂鄉侯胡公薨、越若來四月辛
酉、塋我君文恭侯、於是掾太原王允鴈、門卑整

屬扶風曾宙、潁川殷歷等，僉謂公之德也。柔而不犯，威而不猛，文而不華，實而不朴，靜而不滯，動而不躁。總天地之中和，覽生民之上操。聰明膚敏，兼質先覺，涉觀憲法，契闕文學。睹臯陶之闡闡，探孔子之房奧。然而約之以禮，守之以恭，寬之以納衆，汎愛多容。其誘人也，恂恂焉；怡怡焉。能使蒙惑開析，僞戾優順，逸惰勤信。及其創基發跡，機密聖朝，其知其能。夙夜惟寅，以允帝命。是以頻繁機極，三升而不出焉。乃還譚其舊。

章彌綸古訓，貫萬品，研精微，用補前臣之所闕。
十年而無愆，強記同乎富平。周慎過于博士，偶
山甫乎喉舌。匹虞龍而納言，唯帝命公以二郡。
其爲政也，導人以德，帥物以已，敦以忠肅，勵以
知耻，人悅其化，天樂其和。士相勉于公朝，民勸
行于私家，徽纒縈而靡係，鞭朴棄而無加，洋洋
乎若德宣治，嚴以爲威，寬以爲福而已哉。五作
卿士，七蹈相位，太僕司農，太傅司空各一，司徒
特進各二，太常太尉各三，光輔六世，歷載三十。

有餘其致治也。通水泉于潤下。蕃后土于稼穡。訓五品于羣黎。叅人物于區域。耀三辰於渾元。協大中於皇極。傳聖德於幼冲。率旦奭於舊職。譬彼四時。功成則退。在盈思冲。升降以順。建封域於南土。踐殊號於特進。榮祚統業。垂乎來胤。公自二郡及登相位。凡所辟用。遂至大位者。故司徒中山祝括其餘。登堂閣。據賦政。策勲樹功。流化者。蓋不可勝載。唯我末臣。頑蔽無聞。仰慕羣賢。惡乎可及。自公寢疾。至于薨斃。叅與嘗禱。

列位喪位、雖庶物戮力、不愆於禮、進睹墳塋、几筵空設、退顧堂廡、音儀永闕、感悼傷懷、心肝若割、相與累次德行、撰舉功勲、刊之于碑、用慰哀思、其詞曰

煥文德、伊朝后、應期運、作漢輔、嘉中興、膏民庶、澤洪濔、亶攸序、亘地區、充天宇、麟高達、踵遐武、揚景烈、垂不朽、仰邃古、耀昆後、

胡公碑

公諱廣、字伯始、南郡華容人也、其先自媯姓、建

國南土。曰胡子。春秋書焉。列于諸侯。公其後也。考以德行純懿。官至交趾都尉。公寬裕仁愛。覆載博大。研道知幾。窮理盡性。凡聖哲之遺教。文武之未墜。罔有不綜。年二十七。察孝廉。除郎中尚書侍郎左丞尚書僕射。內正機衡。允釐其職。文敏暢乎庶事。密靜周乎樞機。帝用嘉之。遷濟陰太守。公乃布愷悌。宣柔嘉。通神化。導靈和。揚惠風。以養真。激清流。以盪邪。取忠肅于不言。消奸宄於爪牙。是以君子勤禮。小人知耻。鞠推息

於官曹、刑戮廢于朝市、餘貨委于路衢、餘種棲
于畝畝、遷汝南太守、增修前業、考績旣明、入作
司農、實掌金穀之淵藪、和均關石、王府以充、遂
作司徒、昭敷五教、進作太尉、宣暢渾元、人倫輯
睦、日月重光、遭國不造、帝祚無主、援立孝桓、以
紹宗緒、用首謀定策、封安樂鄉侯、戶邑之數、加
于羣公、入錄機事、聽納總已、致位就第、復拜司
空、敷土導川、俾順其性、功遂身退、告疾固辭、乃
爲特進、爰以休息、又拜太常、典司三禮、敬恭禋

祀神明嘉歆永世豐年聿懷多福復拜太尉尋
申前業又以特進逍遙致位又拜太常邁疾不
夷遜位歸爵遷於舊都徵拜太中大夫延和末
年聖主革正幸臣誅斃引公爲尚書令以二千
石居官委以閭外之事釐改度量以新國家弘
綱旣整袞闕以補乃拜太僕車正馬閑六駟習
馴遷太常司徒成宗晏駕推建聖嗣復封故邑
與叅機密寢疾告退復拜太傅錄尚書事于時
春秋高矣繼親在堂朝夕定省不違子道旁無

几杖言不稱老居喪致哀率禮不越其接下答
賓雖幼賤降等禮從謙厚尊而彌恭勞思萬機
身勤心苦雖老萊子嬰兒其服方叔克壯其猷
公旦納於台屋正考父俯而循禮曷以尚茲夫
蒸蒸至孝德本也體和履忠行極也博聞周覽
上通也勤勞王家茂功也用能十登三事篤受
介祉亮皇業于六王嘉丕績于九有窮生人之
光寵享黃耇之遐紀蹈明德以保身與福祿乎
終始年八十有二建甯五年春壬戌薨于位天

子悼痛贈策賜誄諡曰文恭如前傳之儀而有、
加焉禮也故吏司徒許詡等相與欽慕崧高蒸、
民之作取言時計功之則論集行跡銘諸琬琰、
其詞曰、

伊漢元輔時惟文恭聰明叡哲思心瘁容畢力
天機帝休其庸賦政於外有邈其蹤進作卿士
粵登上公百揆時序五典克從萬邦黎獻共唯
時雍勲烈旣建爵土乃封七被三事再作特進
弘唯幼冲作傳以訓赫赫猗公邦家之鎮澤被

華夏遺愛不淪日與月與齊光並運存榮亡顯
沒而不泯

太尉汝南李公碑

公諱咸字元卓汝南西平人蓋秦將李信之後
孝武大將軍廣之胄也枝流葉布家于茲土文
武繼踵世爲著姓曾祖父江夏太守伯父東郡
太守公受純懿之資萃忠清之節夙夜嚴慄孝
配大舜敦詩書而悅禮樂觀天文而察地理動
與神合契叶乾行操邁伯夷德追孔父舉孝廉

除郎中、光祿茂才、遷衛國公相、受高密令、勤恤
民隱、政成功簡、遷徐州刺史、百司震肅、饕餮風
靡、惡直醜正、恭事法宮、帝念其勤、屢被榮命、漁
陽太守、還遷度遼將軍、協德魏絳、和戎綏邊、徵
河南尹、母憂乞行服、闕奔命、孝和皇帝時、機密
久缺、百僚僉允、詔拜尚書、厯僕射、令納言、危行
不紂、以公事去、民神憤怒、羣公薦之、帝曰、俞哉
徵拜將作大匠、大司農、大鴻臚、大僕射、公所蒞
任、憲天心、以教胄、激垢濁、以揚清、懿鑠之美、昭

登於上不顯之化、宣聞于下、及遷台司、位太尉、
補袞闕、叙彝倫、天人交格、終始無疵、雖元凱翼
虞、周召輔姬、未之或踰、功遂身退、以疾自遜、求
歸田里、告老致仕、七十有六、嘉平四年薨、海內
咨嗟、莫不惻焉、故吏潁川太守張溫等相與歎
曰、名莫隆於不朽、德莫盛于萬世、銘勒顯于鐘
鼎、清烈光于來裔、刊石立碑、德載不泯、詞曰
天垂三台、地建五岳、降生我公、應鼎之足、奕世
載德、名昭圖錄、旣文且武、桓桓紹續、外則折衝

內則大麓惟清惟敏、品物以熙、告老懸車、天人
靡欺、曾不百齡、圯我國基、人之云亡、八極悼思、
申德作頌、光寵宣流、鐫紀斯石、鴻烈顯休、

太尉楊公碑

公諱秉字叔節、弘農華陰人、其先蓋周武王之
穆、晉唐叔之后也、末葉以支子食邑于楊、因氏
焉、周室旣微、裔胄無緒、暨漢興、烈祖楊喜佐命
征伐、封赤泉侯、嗣子業紘、冕相繼、公之不考、以
忠蹇亮、弼輔季安、登司徒、太尉、公承夙緒、世篤

儒教以歐陽尚書京氏易誨授四方學者自遠而至蓋踰三千初辟司空舉高第拜侍御史遷豫州兗州刺史任城相徵入勸講拜太中大夫左中郎將尚書出補右扶風畱拜光祿大夫遭權嬖貴盛六年守靜外戚火燔乃遷太僕太卿公事絀位浹辰之間俾位河南憤疾豪強見邁姦黨用嬰疾廢起家復拜太常遂陟三司沙汰虛冗料簡貞實抽援表達與之同蘭芳任鼎重從駕南巡爲朝碩德然知權過於寵私富侔國

大臣苛察、望變復還、條表以聞、啟導上怒、其時
所免州牧郡守五十餘人、饗戾是黜、英才是烈、
善否有章、京夏清肅、在位七載、年七十有四、延
熹八年五月丙戌薨、朝廷惜焉、寵賜有加、公自
奉嚴、敕動遵禮度、量材授任、當官而行、不爲義
糾、疾是苛政、益固其守、厨無宿肉、噐不鏤雕、夙
喪孿儷、妾不嬖御、可謂立身無過之地、正直清
儉、該備者矣、昔仲尼嘗垂三戒、而公免焉、故能
匡朝盡直、獻可去奸、忠侔前後、聲塞宇宙、非黃

中純白窮達一致其惡能立功立事敷聞于下
昭升于上若茲巍巍者乎于是門人學徒相與
刊石樹碑表勒鴻勲讚懿德傳億年於戲公唯
嶽靈天挺德翼赤精氣綱緼仁哲生應台任作
邦楨帝欽亮訪典刑道不惑迄有成光遐邇穆
其清

司空文烈侯楊公碑

曰漢有國師司空文烈侯楊公公唯司徒之孫
太尉公之胤子皇祖考以懿德胥及肄勤式建

休勲啟洪範。公祇服弘業。克丕堂構。小乃不敢
不慎。大亦不敢不戒。用罔有擇言失行。在于其
躬。泊在辟舉。先志載言。罔不攸該。乃自宰臣。以
從王事。立功不有。用辭其祿。逮作御史。允執國
憲。納于侍中。在帝左右。爰董武事。王師孔閑。羣
公以舊德碩儒。道通術明。宜建師保。延入華允。
侍宴露寢。敷典誥之精旨。達聖王之聰獻。帝以
機密齊栗。常伯劇任。鮮克知臧。以釐其采。命公
再作少府。俾率其屬。以熙庶績。天地作險。國家

丕承軍門祛禁式遏寇虐。命公再作光祿勳。總其熊羆之士。不貳心之臣。保乂帝家。巖巖大理。惟制民命。命公作廷尉。惟刑之恤。旁施四方。惟明折獄。蔽罪于憲之中。亦惟三禮六樂。國之元幹。命公作太常。明德惟馨。八音克諧。神人以和。永世豐年。溥天率土。而衆莫外命。公作司空。公唯戢之。翊明其政。時惟休哉。惟天陰隲下民。彝倫所由順序。命公作司徒。而敬敷五教。以親百姓。父義母慈。兄友弟恭。子孝。時惟休哉。昭教于

辟雍。命公作三老。帝躬以祇敬。遵有虞于上庠。茫茫大運。垂光烈曜。命公作太尉。璇璣運周。七精循軌。時惟休哉。帝欲宣力于四方。公則翼之。辟道或違。公則弼之。虔恭夙夜。不敢荒寧。用對揚天子丕顯休命。天子大簡其勲。用授爵賜封侯于臨晉。功成化洽。景命有傾。帝乃震慟。執書以泣。命于左中郎將郭儀作策。賜公驃騎將軍。臨晉侯印綬。兼號特進。諡以文烈。寵命畢備。而後卽世。肆其孤彪。敢儀古式。昭銘景烈。銘曰。

天鑒有漢、誕生元輔、世作三事、勛在王府、乃及
伊公、克光前矩、悉心畢力、膺其祖武、化洽羣心、
澤霑區宇、帝曰文烈、朕嘉君功、爲邑河渭、建茲
土封、申備九錫、以祚其庸、位此特進、于異羣公、
昔在申呂、匡佐周宣、崧高作頌、大雅揚言、今我
文烈、帝載用熙、參光日月、比功四時、身歿名存、
永世慕思、

漢太尉楊公碑

公諱賜字伯猷、弘農華陰人、姬姓之國、有楊侯

者。公其後也。其在漢室、赤泉侯佐高丞相翼宣、咸以盛德、光于前朝、祖司徒考太尉繼跡宰司、咸有助烈、公承家崇軌、受天醇素、欽承奉構、閑于伐柯、烈風維變、不易其趣、文藝典籍、尋道入輿、操清行朗、潛晦幽閒、不答州郡之命、辟大將軍府、不得已而應之、遷陳倉令、公乃因是行退居廬、公車特徵、以病辭、司空舉高第、拜侍中、越騎校尉、帝篤先業、將問故訓、公以羣公之舉、進授尚書于禁中、遷少府光祿勳、敬揆百事、莫不

時序庶尹知恤。聞闔推清。列作司空。地平天成。陰陽不忒。公遂身避。託疾告退。又以光祿大夫受命司徒。敬敷五品。宣洽人倫。燮和化理。股肱耳目之任。靡不克明。及至太尉。四時順動。三光耀潤。羣生豐遂。太和交薄。三作六卿。五蹈三階。受爵開國。應位特進。非盛德休功。假于天人。孰能該備寵榮。兼包令錫。如公之至者乎。公體資明哲。長於知見。凡所辟選。升諸帝朝者。莫非瑰才逸秀。并叅諸佐。惟我下流。二三小臣。穢損清

風愧于前人，乃糾合同寮，各述所審紀公勲績，刊石立銘，以慰永懷。銘曰：

天降純嘏，篤生柔嘉。俾膺祖考，光輔國家。三業在服，帝載用和。粵暨我公，允執忠貞。在棟伊隆，于鼎斯甯。德被宇宙，華夏以清。受茲介福，履祚孔成。爲邑河渭，袞冕絃珽。以佐天子，祇事三靈。丕顯伊德，萬邦作程。爰銘爰贊，式昭懿聲。

文烈侯楊公碑

公諱賜，字伯猷，兼通五典，周覽篇籍，以爲尚書。

帝王之要政。有國之大本也。是以三葉相承。研其精義。五代之微言。王政之約綱。罔不尋其端源。究其條貫。凜乎其見聖人之情旨也。蓋以蹈騰餘蹤。思高游夏。初潛山澤。授誨童冠。後生賴以發祛蒙蔽。文其材素者。蓋不可勝數。乃由宰府。遂作帝臣。于時聖幼將入學。羣公以公溫。故知新德。宜保師。乃以越騎校尉。援侍華光之內。帝坐已北面。以納大誨。其教人善誘。則恂恂焉。罔不伸也。引情致喻。則閭閻焉。罔不釋也。迄用

有成。緝熙光明。惟帝念功。六在九卿。三事勛假。
皇天澤充。區域疆土。建封申增。戶邑人臣之極。
位兼而有之。然處豐益。約尤命滋恭。可謂高朗。
令終。有始有卒者已。於是門生大將軍何進等。
瞻仰洙泗。公喪之禮。糾合朋徒。稽諸典制。僉以。
爲匡弼之功。政事之實。詔策之文。則史臣志其。
詳。若夫道術之美。授之方策。則是門人二三小。
子所特貫綜。敢竭不才。譔錄所審。言于碑。乃申。
頌曰。

巍巍聖猷、匪師不昭、士子因蒙、匪師不教、於皇
文父、邈哉伊超、如玉之固、如嶽之喬、鑽之斯堅
仰之彌高、示我顯德、授我無隱、正席傳道、承帝
之問、誨茲一人、萬邦作順、微微我徒、實賴遺訓
文武作式、元勛旣奮、光啟爵土、垂統末胤、存榮
亡哀、沒而不泯、

司空房楨碑

公言非法度不出于口、行非至公、不萌于心、治
身則伯夷之潔也、儉嗇則季文之約也、盡忠則

史魚之直也。剛乎則山甫之勵也。總茲四德。式
是百辟。夙夜匪懈。以事一人。枉絲髮。樹私恩。不
爲也。討無禮。當彊禦。弗避也。是以功隆名顯。在
世孤特。不獲愷悌寬厚之譽。享年垂老。至于積
世。門無立車。堂無宴客。衣不變裁。食不兼味。雖
易之貞厲。詩之羔羊。無以加也。

明明在公。寔惟皇后。誕應正德。式作漢輔。邪慝
是仇。直亭是與。剛則不吐。柔則不茹。媚茲天子。
以靖土宇。

司空袁逢碑

凡所臨君明而先覺故能教不肅而化成政不
嚴而事治其惠和也晏晏然其博大也洋洋焉
信可謂兼三才而該剛柔無射于人斯矣銘曰
天鑒有漢賜茲世輔顯允厥德昭胤休序峩峩
雍宮禮樂備舉穆穆天子孝敬允叙降拜屏著
奉饋西序威儀聿修化溢區宇乃尹京邑總齊
禁旅

荊州刺史庾侯碑

君資天地之正氣含太極之純精明潔鮮於白
珪貞操厲乎寒松視鑒出于自然英風發乎天
受事親以孝則行侔於曾閔結交以信則契明
於黃石溫溫然弘裕虛引落落然高風起世信
荆山之良寶靈川之明珠也爰在弱冠英風固
以揚于四海矣拜爲荊州刺史仗冲靜以臨民
施仁義以接物恩惠著于萬里誠信暢于殊俗
由是撫亂以治綏擾以靜帝嘉其功錫以車服
方將掃除寇逆清一宇宙廓天步之艱難甯陵

夷之屯否

朱公叔墳前石碑

維漢二十一世延熹六年粵四月丁巳忠文公
益州太守朱君名穆字公叔卒于京師其五月
丙申葬于宛邑北萬歲亭之陽舊兆域之南其
孤野受顧命曰古者不崇墳不封墓祭服雖三
年無不於寢今則易之吾不取也爾其無拘于
俗無廢予誠野欽率遺意不敢有違封墳三板
不起棟宇乃作祠堂于邑中南陽舊里備器鑄

鼎銘功載德懼墳封彌久夷于平壤於是依德
像緣雅則設茲方石鎮表靈域用慰其孤罔極
之懷乃申詞曰

歆惟忠文時惟朱父實天生德丕承洪緒彌綸
典術允廸聖矩好是貞厲疾彼強禦斷剛若仇
柔亦不茹仍用明夷遘難受侮帝曰休哉朕嘉
乃功命汝納言肩汝祖蹤父拜稽首翼翼惟恭
篤恭不忘夙夜在公昊天不弔降茲殘殃不遺
一父俾屏我皇我皇悼心錫詔孔傷位以益州

贈之服章用刊彝器宣昭遺光子子孫孫永載
寶藏

陳畱太守胡公碑

君諱碩字季獻交趾都尉之孫太傅安鄉侯少
子也其先與楚同姓別封于胡以國爲氏臻乎
漢奕世載德不替舊勲君幼有嘉表克岐克嶷
不見異物習與性成孝于二親養色甯意蒸蒸
雍雍雖曾閔顏萊無以尚也總角入學治孟氏
易歐陽尚書韓氏詩博綜古文周覽篇籍言語

造次必以經綸。加之行已忠儉。事施順恕。公體所安。與衆共之。驕吝不萌于內。喜愠不形於外。可謂無競伊人。溫恭淑慎者也。初以公在司徒除郎中。宿衛十年。遭叔父憂。以疾自免。州郡交辟。皆不就。後以大將軍高第。拜侍御史。遷諫議大夫。以將軍事免官。舉賢良方正。不詣公車。建甯元年。召拜議郎。納忠盡規。匪懈于位。遷侍中。虎賁中郎將。是年遭疾。屢上印綬。詔書聽許。以侍中養疾。其年七月。被尚書召。不任。應命。詔使

請者劉惔齋卽拜陳畱太守君聞使者至
加朝服拖紳使者致詔君以手自擊陳辭謝恩
其明二十一日遣吏奉章報謝意氣精朗是日
疾大漸刻漏未分奄忽而卒時年四十一天子
憫悼詔使者王謙送葬以中牢具祠賜錢五萬
布百疋贈穀三十斛同位畢至赴弔雲集生榮
未艾沒有餘哀於是遐邇指紳爰暨門人相與
歎述君德追痛不寘恒切情僚無不永懷行由
已作名自人成先民旣邁賴茲頌聲嗟我明哲

如何勿銘乃作辭曰

猗歟懿德令聞有彰祇服其訓克構克堂孝思
唯則文藝丕光敦厚忠恕衆悅其良綏弱以仁
不云我強爰自登朝進退以方見幾而作如鴻
之翔乃位常伯恪處左右兼掌虎賁禁戎允理
邁茲虐病帝用悼止俾守陳畱庶篤其祉王人
旣詔景命不俟嗚呼昊天殲我英士如何贖也
命不自己哀哉永傷萬年是紀

太守胡公碑

君諱碩字季獻交趾都尉之孫太傅安樂侯之子也順帝時爲郎中桓帝時遭叔父憂以疾自免荊州將軍每辟輒辭疾後以高等拜侍御史遷諫議大夫舉賢良方正病不詣公車建寧元年七月拜陳畱太守病劇不任應召詔使謁者劉惔卽授印綬二十一日卒詔遣使者王謙以中牢具祠特賜錢五萬布一百疋贈穀三千斛儔類赴送遠近鱗集於時陳畱主簿高吉蔡軫等咸以郡選充備官屬來迎者三十四人奔驚

跋涉願承清化逢天之戚不獲延祚痛心絕望
忉怛永慕乃相與衰經庭位號咷靈柩將窆申
敕脩儀疚在輿服寮御部引各執其職路人感
愴觀者歎息遂樹碑作銘以表令德銘曰

於藐下國瞻仰俊乂欽見我君爰綏我惠式昭
績恩有勞其悴昊天不弔景命顛墜悠悠蒸黎
惆悵喪氣政雖未宣古之遺愛祁祁我君習習
冠蓋修誠以迓曾不東邁靈魂徘徊靡所瞻逮
惟其傷矣胸肝摧碎勒銘告哀傳千萬代

陳太邱碑

先生諱寔字仲弓、潁川許昌人也、含元精之和、
應期運之數、兼資九德、總修百行、於鄉黨則恂
恂焉、斌斌焉、善誘善導、仁而愛人、使夫少長咸
安懷之、其爲道也、用行舍藏、進退可度、不徼訐
以干時、不遷貳以臨下、四爲郡功曹、五辟豫州、
六辟三府、再辟大將軍、宰聞喜、半歲太邱一年、
德務中庸、教敦不肅、政以禮成、化行有謐、會遭
黨事、禁錮二十年、樂天知命、澹然自逸、交不諂

上愛不瀆下見幾而作不俟終日及文書赦宥
時年已七十遂隱邱山懸車告老四門備禮閑
心靜居大將軍何公司徒袁公前後招辟使人
曉諭云欲特表便可入踐常伯超補三事紆佩
金紫光國垂勲先生曰絕望已久飾巾待期而
已皆遂不至弘農楊公東海陳公每在袞職羣
僚賀之皆舉手曰潁川陳君命世超倫大位未
躋慚于文仲竊位之負故時人高其德重于公
相之位也年八十有三中平三年八月丙午遭

疾而終。臨沒顧命。畱塋所。平時服素棺。槨財周
櫬。喪事唯約。用過乎儉。羣公百僚。莫不咨嗟。巖
藪知名。失聲揮涕。大將軍弔祠。錫以嘉謚。曰微
士陳君。稟嶽瀆之精。苞靈曜之純。天不憖遺一
老。俾屏我王。梁崩哲萎。于時靡憲。縉紳儒林。論
德謀跡。謚曰文範。先生傳曰。郁郁乎文哉。書曰
洪範九疇。彝倫攸叙。文爲德表。範爲土。則存誨
沒號。不亦宜乎。三公遣令史祭以中牢。刺史敬
弔。太守南陽曹府君命官作誄曰。赫矣陳君。命

世是生、含光醇德、爲士作程、資始旣正、守終又
令、奉禮終沒、休矣清聲、遣官屬掾吏前後赴會、
刊石作銘、府丞與比縣會葬、荀慈明、韓元長等、
五百餘人、總麻設位、哀以送之、遠近會葬千人、
以上、河南尹种府君臨郡、追歎功德、述錄高行、
以爲遠近鮮能及之、重部大掾以成斯銘、可謂
存榮沒哀、死而不朽者也、乃作銘曰、

峩峩崇嶽、吐符降神、於皇先生、抱寶懷珍、如何
昊穹、旣喪斯文、微言圯絕、來者曷聞、交交黃鳥、

爰集于棘，命不可贖，哀何有極。

陳太邱廟碑

維中平五年春三月癸未，豫州刺史典以褒功，述德政之大經，是以作諡封墓，興於周禮，衛鼎晉銘，其昭有實。故太邱長潁川許昌陳寔字仲弓，含聖哲之清和，盡人才之上美，光明配于日月，廣大資乎天地，辟四府，宰三城，神化著於民物，形表圖於丹青，巍巍乎其不可尚也，洋洋乎其不可測也。儉約違時，懸車致仕，徵辟交至，遂

不屑就春秋八十有三寢疾而終大將軍賜諡
羣后建碑國人立廟先生有二子季方元方皆
命世希有繼期特立季方盛年早亡亦圖容加
諡元方在喪毀瘁消形嘔血純孝過哀率禮不
越于時嘉異畫像郡國欽盛德之休明懿鐘鼎
之碩義乃樹碑鐫石垂世寵光詞曰

於皇先生冠耀八荒闡德之宇探道之綱繼期
立表以訓四方惟亮天工羣生之望高明允實
有馥其芳載德奕世休有烈光欽慕在人舊有

憲章過牧斯州庶奉清塵棄予而邁靡瞻靡聞
嗟哉懷矣曷所咨詢告哀金石式昭其勤

文範先生陳仲弓碑

君諱寔字仲弓潁川許人也其先出自有虞氏
中葉當周之盛德有媯滿者武王配以太姬而
封諸太昊之墟是爲陳胡公春秋之末失其爵
土遂以國氏焉世篤懿德令聞丕顯君膺皇靈
之清和受明哲之上咨憑先民之遐迹秉立妙
之淑行投足而襲其軌施舍而合其量夫其仁

愛溫柔、足以孕育羣生、廣大寬裕、足以包覆無
方、剛毅強固、足以威暴矯邪、正身體化、足以陶
治世心、先生有四德者、故言斯可象、靜斯可効、
是以邦之子弟、遐方後生、莫不同情瞻仰、由其
模範、從其趣尚、戾狠斯和、爭訟化讓、雖嚴威猛、
政迫以刑戮、未若先生潛導之速也、其立朝事
上也、恭順貞厲、含章方直、無顯諫以彰直、不割
高而引長、常幹州郡腹心之任、義則進之以達
道、否則退之以光操、然後德立名宣、蓋于當世。

辟司徒府，納規陳謀，匡弼三事。人用昭明，台階允甯。遷聞喜長清風，暢於所漸。儉節溢於監司，郡政有錯，爭之不從。卽解綬去，復辟太尉府。遷太邱長，民之治情歛慾。友於端懿者，猶草木之偃於翔風。百卉之挺于春陽也。以所執不協，所屬色斯舉矣。不俟終日。辟大將軍府，道之行廢，有分於命。乃羅密網，以就禁錮。潛伏不試，十有八年。大忌蠲除，舉賢良方正。大將軍司徒並辟君曰：七十有懸車之禮，况我過諸，遂不應其命。

容止法度。老而彌壯。凡所履行。事類博審。不可
勝數。畧舉首日。其實錄記。在乎其傳。春秋八十
有三。中平三年八月丙子卒。大將軍三公使御
屬往弔祠會葬。作誄。諡曰文範先生。刺史太守
樹碑頌德。許令以下。至于國人立廟舊邑。四時
蒸嘗。歡哀承祀。具如祖禰。先生存獲重。稱亡歆
血食。修行于已。得斯于人。固上世之所罕有。前
哲之所不過也。孤嗣紀銜恤在疚。敢錄言行終
始所守。乃有二三友生。咨度禮則。咸曰。君化道

神速行于有國法施於民祀典所宗鄉人之祠
非此遺孤所得專也昔者先生甚樂茲土築室
講誨精靈所甯紀順奉雅意遂定兆域宜有銘
勒表墳墓俾後生之歌詠德音者如邱封之存
斯也乃作銘曰

於熙文考天授弘造淵玄其深巍峩其高剛而
無虞柔而不撓誕鋪模憲示世作教君之誨矣
民胥効矣道行斯進廢乃斯止鮮我顯泰旣多
幽否含榮取辱涅而不緇德之休明賤不爲耻

超邈其猷莫與方軌

郭有道林宗碑

先生諱泰字林宗太原界休人也其先出自有
周王季之穆有虢叔者實有懿德文王咨焉建
國命氏或謂之郭卽其後也先生誕膺天哀聰
叡明哲孝友溫恭仁篤慈惠夫其器量弘深姿
度廣大浩浩焉汪汪焉與乎不可測已若乃砥
節勵行直道正辭貞固足以幹事隱括足以矯
時遂考覽六經探綜圖緯周流華夏隨集帝學

收文武之將墜，拯微言之未絕。于時纓綬之徒，
紳佩之士，望形表而景附，聆嘉聲而響和者，猶
百川之歸巨海，鱗介之宗龜龍也。爾乃潛隱衡
門，收朋勤誨，童蒙賴焉。用祛其蔽，州郡聞德，虛
已備禮，莫之能致。羣公休之，遂辟司徒掾。又舉
有道，皆以疾辭。將蹈洪崖之遐跡，紹巢許之絕
軌，翔區外以舒翼，超天衢以高峙。稟命不融，享
年四十有三。以建甯二年正月乙亥卒。凡我四
方同好之人，永懷哀悼，靡所寘念。乃相與惟先

生之德以謀不朽之事、僉以爲先民旣沒而德、音猶存者亦賴之于見述也、今其如何而闕斯禮、于是樹碑表墓、昭銘景行、俾芳烈奮乎百世、令聞顯于無窮、其辭曰、

於休先生、明德通玄、純懿淑靈、受之自天、崇壯幽浚、如山如淵、禮樂是悅、詩書是敦、匪惟撝華、乃尋厥根、宮牆重仞、允得其門、懿乎其純、確乎其操、洋洋搢紳、言觀其高、棲遲泌邱、善誘能教、赫赫三事、幾行其招、委辭召貢、保此清妙、降年

不永民斯悲悼爰勒茲銘摘其光耀嗟爾來世
是則是效

貞節先生范史雲碑

先生諱丹字史雲陳畱外黃人陶唐氏之後也
其在周室有士會者爲晉大夫以受范邑遂以
爲氏漢文景之際爰自南陽來家于成安生惠
延熹二年官至司農廷尉君則其後也君受天
正性志高行潔在乎幼弱固已藐然有烈節矣
時人未之或知屈爲縣吏亟從仕進非其好也

退不可得乃託死遁去。親戚莫知其謀。遂隱竄山中。涉五經。覽書傳。尤篤易與尚書。學立道通。久而後歸。遊集太學。知人審友。苟非其類。無所容納。介操所在。不顧貴賤。其鄉黨也。事長惟敬。養稚惟愛。言行舉動。斯爲楷式。郡縣請召。未嘗屈節。其有備禮招延。虛已迓止。亦爲謀奏。盡其忠直。以處士舉。孝廉。除郎中。萊蕪長。未出京師。喪母。行服。故事。服闋後。還郎中。君遂不從。州郡之政。凡其事君。過則弼之。闕則補之。通清夷之

路塞邪枉之門，舉善不拘階次，黜惡不畏強禦。其事繁多，不可詳載。雅性謙儉，體勤能苦，不樂假借。與從事荷負徒行，人不堪勞，君不勝其逸。辟太尉府，俄而冠帶，或以羣黨見嫉。時政用受禁錮，君罹其罪，閉門靜居。九族中表莫見其面。晚節禁寬，困于屢空，而性多檢括，不治產業，以爲卜筮之術。得因吉凶道治民情，以受薄償，且無咎累。乃鬻卦于梁宋之域。好事者覺之，應時輒去。禁旣蠲除，太尉張公、司徒崔公前後四辟。

皆不就仕，不爲祿故，不牽於位，謀不苟合，故特
立于時，是則君之所以立節明行，亦其所以後
時失途也。年七十有四，中平二年四月卒。太尉
張公、兖州劉君、陳畱太守淳于君、外黃令劉君
僉有休命，使諸儒叅按典禮，作誄著謚，曰貞節
先生，昭其功行，錄記所履，謀于耆舊，刊石樹銘，
光示來世。銘曰：
於顯貞節，天授懿度，誕茲明哲，允迪德譽。如淵
之清，如玉之素，潤之不濁，涅之不汙，用行思忠。

舍藏思固伯夷是師，史鮪是慕，榮貧安賤，不憊窮迂，甘死善道，遺名之故，身沒譽存，休聲載路。

彭城姜伯淮碑

先生諱肱，字伯淮，彭城廣人也。其先出自帝胤，在皇唐蓋與四岳其葉。能禮于神，舜命秩宗。爰封于呂，其裔呂望佐周克殷，俾侯齊國，姓有姜氏，卽其後也。高祖祖父皆豫章太守，頽陰令，先生旣蹈先世之純德，體英妙之高姿，立性純固，百行修備，故其平生所能，事親惟孝，如大舜五

十而慕友于兄弟。有棠棣之華。萼韡之度。體惠
理和。有上德之素。安靜守約。恩及嬰兒。至操動
信。邑中化之。外戶不閉。治藏無隱。及其學而知
之者。三墳五典。八索九丘。俯仰占候。推步陰陽。
有名物定事之能。獨見先覩之効。然猶學而不
厭。誨人不倦。童冠自遠方而集者。蓋千餘人。夫
水盈而流。德交而形。是故德行外著。洪聲遠布。
華夏同稱。名振當世。凡十辟公府。九舉賢良。方
正。公車特徵。立纁禮聘。又家拜犍爲太守。大中

大夫先生盤桓育德莫之肯就不隕穫于貧賤
不充詘于富貴拔乎其萃出乎其類生民之傑
也年七十有七熹平二年四月辛巳卒于是從
遊弟子陳畱申屠蟠等悲悼傷懷懼微言之欲
絕感絕倫之盛事乃建碑于墓甄述景行銘曰
邈矣先生應天淑靈孝友是備上德是經弘此
文藝耽怡是甯恂恂善誘童冠來誠有燁其譽
有煥其聲顯顯羣公並加辟命赫赫聖皇仍獲
其聘委策避國守此玄靜綽乎其裕確乎其操

疇昔洪崖雙名並高嗟乎殞沒搢紳永悼依依

我徒靡則靡效勒銘金石彌遠益曜

舊本蔡中郎集載伯

淮碑誤書建安二年卒宋人謂邕建安前已先逝因疑此碑爲僞不知後漢書伯淮之沒蓋憲平二年也在邕爲先輩大儒此碑實出邕筆今改正建安二字爲憲平可耳

翟先生碑

世以仁義爲質學問爲業爰暨先生固天縱德應運立言繼期五百實行形于州里明哲與聖合契該通五經兼洞墳籍爲萬里之場圃九隩之林澤挹之若江湖仰之若華岳立焉測之

則無源、汪汪焉酌之則不竭、可謂生民之英者
已、國失元傳、學失表式、凡百搢紳、哀矣泣血、人
百其身、匪云來復、于是鄉黨乃相與登山伐石、
而勒銘曰、

邈矣先生、厥德孔貞、腹心弘道、深高八神、王錫
三命、觀國之賓、其視富貴、忽若浮雲、既不降志、
亦不辱身、

汝南周巨勝碑

君諱勰、字巨勝、陳畱太守之孫、光祿勳之子也、

君應坤乾之淳靈、繼命世之期運、立懿清明、貞厲精粹、體仁足以長人、嘉德足以合禮、總六經之要、括河洛之機、援天心以立鈞、贊幽明以揆時、沉靜微密、淪于無內、寬裕弘博、含乎無外、巨細洪纖、罔不總也、是以實繁于華、德盈乎譽、初以父任拜郎中、疾去官、察孝廉、是時郡守梁氏外戚貴寵、非其好也、遂以病辭、太守復察孝廉、乃俯而就之、以明可否、然猶私存衡門、講誨之樂、不屑已也、又委之而旋、故大將軍梁冀專國

作威、海內從風、世之雄材、優逸之徒、莫不委質、從命、而顛覆者、蓋亦多矣、聞君洪名、前後三辟、卒不降身、由是搢紳歸高、羣公事德、太尉司徒、再辟三辟、察賢良方正、州舉孝廉、皆病不就、擾攘之際、災眚仍發、聖上詢諮師錫、策命公車、特徵君、仰瞻天象、俯察人事、世路多險、進非其時、乃托疾杜門、靜居里巷、外無人跡、庭生蓬蒿、如此者十餘年、強禦不能奪其守、王爵不能滑其慮、至延熹二年、乃更闢門延賓、享宴娛樂、及秋

而梁氏誅滅十二月君卒然則識幾知命可觀
於斯矣洋洋乎若德雖崇山千仞重淵百尺未
足以喻其高究其深也夫三精垂耀處者有表
爰在上世作者七人焉有該百行備九德齊光
日月洞靈神明如君之至者與亶所謂天明之
秀也享年五十不登期考遐邇歎悼痛心失圖
乃相與建碑勒銘以旌休美其辭曰
厥初生民天賜之性有龐有醇有否有聖伊惟
周君允卜其政誕茲明德自貽哲命煥乎其文

如星之布，確乎不拔，如山之固，追踪先緒，應期作度，潛心大猷，覃思德謨，遁世無悶，屢辭王寮，洋洋泌邱，于以逍遙，蔑爾童蒙，是訓是敎，瞻彼榮寵，譬諸雲霄，優哉游哉，侔此弘高，名振華夏，光耀昆苗，清風丕揚，德音孔昭。

處士國叔則碑

伊漢二十有一世處士有國典字叔則者，夫其生也，天真淑性，清理條暢，精微周密，包括道要，致思無形，深總厯部，纖入藝文，藻分葩列，如春

之榮、守根據窮、不虛其聲、偉德若茲、惟世之英、
乃遂隱身高藪、稼穡孔勤、童蒙來求、彪之用文、
不義富貴、譬諸浮雲、州郡禮招、休命交集、徒加
名位而已、莫之能起也、博士徵舉至孝、恥已處
而復出、若有初而無終、潔耿介于丘園、慕七人
之遺風、年七十有五、建甯二年六月卒、臨沒、顧
命曰、知我者其蔡邕、乃爲銘、載書休美、俾來世
昆裔、永有諷誦、于先生之德、其辭曰、

民之齊敏、卓時挺生、思心精叡、綜物通靈、術有

玄妙于時游情、聞道睹異、惕然若驚、守死善操、與世無營、渾其若濁、徐然後清、綽其若煥、終其益貞、有恒實難、獨秉其經、嗟爾來世、是瞻是聽、

光武濟陽宮碑

惟漢再受命曰世祖光武皇帝、考南頓君、初爲濟陽令、濟陽有武帝行過宮、常封閉、帝將生、考以令舍下濕、開宮後殿居之、建平元年十二月甲子夜帝生、時有赤光、室中皆明、使卜者王長卜之、長曰、此善事、不可言、歲有嘉禾、一莖生九

穗長于凡禾。因爲尊諱王室中微。哀平短祚。姦臣王莽。偷有神噐。十有八年。罪盈惡熟。天人致誅。帝乃龍見白水。淵躍昆滇。破前隊之衆。殄二公之師。收兵畧地。經營河朔。戮力戎功。翼戴更始。義不卽命。帝位闕焉。於是羣公諸將。據河洛之文。叶符瑞之珍。僉曰。歷數在帝。踐祚允宜。乃以建武元年六月乙未。卽位鄡縣之陽。五成之陌。祀漢配天。不失舊物。享國三十六年。方內乂安。蠻夷率服。巡狩泰山。禪梁父。皇代之遐迹。帝

者之上儀罔不畢舉道德餘慶延于無窮先民
有言樂樂其所自生而禮不忘其本是以虞稱
媯汭姬美周原皇天乃眷神宮實始于此厥跡
邈哉所謂神麗顯融越不可尚小臣河南尹鞏
瑋先祖銀艾封侯厯世卿尹受漢厚恩瑋以商
箕餘烈郡舉孝廉爲大官丞來在濟陽顧見神
宮追惟桑梓褒述之義用敢作頌頌曰

赫矣炎光爰耀其輝篤生聖皇東漢之微稽度
虔則誕育靈姿黃孽作慝篡握天機帝赫斯怒

爰整其師、應期潛見、扶陽而飛、禍亂克定、羣凶
殄夷、匡復帝載、萬國以綏、巡于四嶽、展義省方、
登封降禪、升于中皇、爰茲初基、天命孔彰、子子
孫孫、保之無疆、

王子喬碑

王孫子喬者、蓋上世之真人也、聞其僊舊矣、不
知興于何代、博問道家、或言潁川、或言彥蒙、初
建斯域、則具斯邱、傳承先人、曰王氏墓、紹膺不
繼、荒而不祠、歷載彌年、莫之能紀、暨于永祿元

年十有二月。當臘之夜。上有哭聲。其音甚哀。附
居者往。聞而怪之。明則登其墓。察焉。洪雪下。無
人踪。見一大鳥跡。有祭祀之處。左右或以爲神。
其後有人着絳冠大衣。杖竹策。立冢前。呼樵孺
子尹禿謂曰。我王子喬也。爾勿復取吾先人墓
前樹也。須臾忽然不見。時令太山萬熙稽古老
之言。感精瑞之應。咨訪其驗。信而有徵。乃造靈
廟。以休厥神。於是好道之儔。自遠來集。或絃歌
以詠太一。或談思以歷丹田。其疾病疴瘵者。靜

躬祈福。卽獲祚。若不虔恪。輒顛踣。故知至德之宅兆。真人之先祖也。延熹八年秋八月。皇帝遣使者奉犧牲以致祀。祇懼之敬肅如也。相國東來王章字伯義。以爲神聖所興。必有銘表。昭示後世。是以賴鄉仰伯陽之踪。闢民慕尹喜之風。乃會長史邊乾訪及士隸。遂樹立石。紀遺烈。俾志道者有所覽焉。詞曰

伊王君。德通靈。含光耀。秉純貞。應大道。爰久榮。棄世俗。飛神形。翔雲霄。浮太清。乘螭龍。載鶴輶。

戴華笠奮金齡揮羽旗曳霓旌權罔極壽億齡
昭篤孝念所生歲終闋發丹情存墓冢舒哀聲
遺鳥跡覺舊城被絳衣垂紫纓呼孺子告姓名
由此悟感怖驚修祠宇反几筵饋饌進甘香陳
時傾顧馨明禋匡流祉熙帝庭祐邦國相黔民
光景福耀無垠

伯夷叔齊碑

熹平五年天下大旱禱請名山求獲答應時處
士平陽蘓騰字玄成夢陟首陽有神馬之使在

道明覺而思之，以其夢陟狀上聞天子，開三府
請雨，使者與郡縣戶曹掾吏登山升祠，手書要
曰：君况我聖主以洪澤之福，天尋興雲，卽降甘
雨，因樹碑爲銘曰：

惟君之質體清良兮，昔佐殷姬，忠孝彰兮，委國
捐爵，諫國亡兮，譏武伐紂，欲喻匡兮，時不可救，
歷運蒼兮，追念先侯，受命皇兮，憂懷感兮，雖沒
不朽，名字芳兮，

九疑山碑

巖巖九疑峻極于天觸石膚合興播連雲時風
嘉雨浸潤下民芒芒南土實賴厥勛逮于虞舜
聖德光明克諧頑傲以孝蒸蒸師錫帝世堯乃
授徵受終文祖璇璣是承泰階以平人以有終
遂葬九疑解體而升登此崔嵬託靈神仙

陳留索昏庫上里社碑

社祀之建尚矣昔在聖帝有五行之官而共工
子勾龍爲后土及其沒也遂爲社祀故曰社者
土地之主也周禮建爲社位左宗廟右社稷戎

醜攸行。於是受脤。土膏恒動。於是祈農。又頒之
于兆民。春秋之中。命之供祠。故自有國至于黎
庶。莫不祀焉。惟斯庫里。古陽武之戶牖鄉也。春
秋時有子華爲秦相。漢興陳平由此社宰。遂佐
高帝克定天下。爲右丞相。封曲逆侯。永平之世。
虞延爲太尉。司空封公。至嘉平。延弟曾孫放。字
子卿。爲尚書令。外戚梁冀乘寵作亂。首策誅之。
王室以績封召都亭侯。太僕太常司空毗天子。
而維四方。克措其功。往烈有常。于是司監爰暨

邦人僉以爲宰相繼踵咸出斯里秦一漢三而
虞氏世焉雖有積善之慶修身之致亦斯社之
所相也乃相與樹碑作頌以示後昆云

唯王建祀明事百神乃顧斯社于我兆民明德
惟馨其慶聿彰自嬴及漢四輔代昌爰我虞宗
乃世重光元勲旣立錫茲土疆乃公乃侯帝載
用康神人協祚且巨且長凡我里人盡受嘉祥
刊銘金石永世不忘

瑯琊王傅蔡公碑

君諱朗字仲明蓋倉頡之精胤姬稷之末胄也
昔叔度文王之昭建侯于蔡以國氏焉迄于平
襄周祚微缺王室遂卑齊晉交爭強楚侵陵昭
侯徙于州來公族分遷氏家于圉奕葉載德常
歷官尹以逮于茲君雅操明允威厲不猛履孝
悌之性懷文藝之才包洞典籍刊摘沉秘知幾
達要通含神契既討三五之術又采二南之業
以魯詩教授生徒雲集莫不自遠並至栖遲不
易其志簞食曲肱不改其樂心棲清虛之域行

在玉石之間。是以德行儒林。智周當代。四岳稱
名。帝曰。予聞元和元年。徵拜博士。舒演與秘贊
理。闕文所立卓爾。度躡雲蹤。其選士也。抑頑錯
枉。進聖擢偉。極遺逸於九臯。揚明德于側陋。拔
茅以彙。幽滯用濟。加以清敏。廣平好是。正直規
誨之策。日諫王庭。忠讜著烈。令聞流行。聖朝以
藩國貴胄。先帝遺體。或以繼絕襲位。正于阿保。
未洽雅訓。驕盈僭差。或蹈憲理。非弘直碩儒。莫
能匡弼。蔡君審行修德。進退可度。遷河間中尉。

瑯琊王傅。乃從經術之方。示以棊謚之威。率禮莫違。其國用靖。雖安國之輔梁孝。仲舒之相江都。靡以加焉。勲績旣盛。帝簡其功。將授上位。遷于紫宮。賦壽不永。遘此疾凶。年五十八。永興六年夏卒。嗚呼哀哉。凡百君子。咨痛罔極。殷懷傷悼。含涕流惻。如何昊天。喪我師則。爰勒斯銘。式昭其德。天敏明哲。於赫我君。含弘光大。玄覽孔真。潛樂教思。韞玉衡門。雲龍感應。養徒三千。珠藏外耀。鶴鳴聞天。若時徵庸。登祚王臣。綜彼前

疑定此典文參佐七德俾相大藩身沒稱顯永
遺令勲表行揚名垂示後昆

立文先生李子材碑

立文先生名休字子材南陽宛人也其祖李伯
陽周柱下史覲衰世而遁焉其後雄俊豪傑往
往崛起自戰國及漢名臣繼踵支胄散逸其遷
于宛尚矣王莽竊位漢祚中移考翼佐世祖匡
復郊廟錫封茅土卿相牧守于時相逐休少以
好學游心典謨既綜七經又精羣經鈞深極奧

窮覽妙旨。居則玩其辭。動則察其變。雲物不顯。必考其占。故能獨見前識。以先神意。若古今常難。疑義錯繆。前人所希論。後學所不覽。休盡剖判。剝散幽暗。靡不昭爛。猶發憤于目所不覩。體所不聞。遂登東岳。觀百王遺風。習容闕里。以協禮衷。退而講誨。童冠仰焉。傳傳如也。郡署五官掾。功曹司空胡公。顯以儒譽。特進大鴻臚。仍優禮。固請秉讓。執虛辭。此三命。不爲利回。不爲義疚。臨寵審已。不動其守。可謂純潔皓素。綽有餘

裕者已其於鄉黨細行敦睦九族篤信交友不可得而詳也初娶配出後配未字年旣五十苗盾不嗣以永壽二年夏五月乙未卒凡其親昭朋徒相與大會而葬之鼎俎之禮節文曲備時令戴君臨喪命謚郡遣丞掾冠蓋咸屆旣定而後罷焉于是故好朋舊僉以仲尼旣沒文不在茲韞櫝美玉喪莫賈之求而無繼悽爾永思乃刊斯石懿德是不吁茲先生秉德恭勤天啟哲心其學孔純經緯是綜雅麗是分行已守道匪

禮不遵處約不戚聞寵不欣榮不能華威不能
震天淑厥命以讓以仁有惠云載惟邦之珍按
典考謚謚以立文身沒名彰配黔作隣遺譽罔
極丕昭億年嗚呼哀哉

郡掾史張立祠堂碑

掾諱立字伯雅河南偃師人也其先張仲者實
以孝友爲名左右周室大漢初興張蒼爲丞相
封北平侯其後自河內遷于茲土世爲顯姓掾
天姿恭恪宣慈惠和允恭博敏惻隱仁恕正身

履道以協閨庭、損用節財、以瞻䟽族、動中規矩、
言合典式、不知名彰、不飾行著、可謂仁粹淑貞、
自然之素者已、論者嘉之、州郡禮招、署致掾史、
沉靜寡欲、不求榮祿、是以豐于天爵、薄于人位、
某月日、遭疾而卒、掾孫翻以貞固之質、受過庭
之訓、獲執戟出宰相邑、遷太守、得大夫之祿、奉
烝嘗之祀、尋原祚之所由、而至于此、先考積善
之餘慶、陰德之陽報、乃于是立祠堂、假碑勒銘、
式明令德、以示乎後、辭曰

於惟我考、允迪懿德、治信斯順、其儀不忒、仁惠
周洽、行惟模則、篤垂餘慶、貽此燕翼、邈矣遺孫、
周懷多福、刊名金石、流于罔極、

袁滿來墓碑

茂德休行、曰袁滿來、太尉公之孫、司徒公之子、
逸才淑姿、實天所授、聰遠通敏、越齒在闕、明習
易學、從誨如流、百家衆氏、遇目能識、事不再舉、
問一及三、具始知終、情性周備、夙有奇節、孝智
所生、順而不驕、篤友兄弟、和而無忿、氣決泉達、

無所疑滯雖冠帶之中士校材考行無以加焉
允公族之殊異國家之輔佐衆律其器士嘉其
良雖則童稚令聞芬芳降生不永年十有五、四
月壬寅遭疾而卒既苗而不穗凋殞華英嗚呼
悲夫乃假碑旌于墓表嗟其傷矣唯以告哀

童幼胡根碑

故陳畱太守胡君子曰根字仲原生有家表幼
而克才角犀豐盈光潤玉顏聰明敏惠好問早
識言語所及智思所生雖成人之德無以加焉

稟命不長夙罹凶災年七歲建甯二年遭疾夭
逝慈母悼痛昆弟孔懷感襁褓之親愛憐國城
之乖離乃權宜就封二祖墓側親屬李陶等相
與追慕先君悲悼遺嗣樹碑刊辭以慰哀思辭
曰

於惟仲原應氣淑靈實有令儀而氣如瑩明之
之性與體俱生聞言斯識覩物知名傳者太勤
受誨則成柔和順美與人靡爭忿不怨懟喜不
驕盈當受福永爲光爲榮如何昊天降此短齡

惜繁華之方曄兮，望嚴霜而凋零。嗟童孺之夭
逝兮，傷慈母之肝情。從皇祖乎靈兆兮，庶神魄
之斯甯。哀慘戚以流涕兮，念污軫之不停。願永
懷于不朽兮，乃託辭于斯銘。

真定直父碑

其接友也，審辨真僞，明于知人，度終始而後交，
情不踈而貌親。

蔡中郎集

卷之三

七

靈表

太傅胡公夫人靈表

夫人編縣舊族章氏之長女也。字曰顯章。令儀小心秉操。塞淵仁孝。婉順率禮。無遺體。季蘭之姿。蹈思齊之跡。永初二年。年十有五。爰初來嫁。誕成家道。仰奉慈姑。竭歡致敬。俯誨膝下。化導周悉。至德修於幾微。徽音暢于神明。故能參妊姒之功。兼生人之榮。朝春路寢。贊桑蠶宮。光寵有暈。祭服有琬。前後奉斯禮者三十餘載。夫人

生五男長曰整伯齊次曰千億叔韓次曰甯穉
威次曰碩季叡伯仲各未加冠遭厲氣同時夭
折叔上郡孝廉季更歷州郡舉茂才葉令京令
爲議郎季以高第爲侍御史諫議大夫侍中虎
賁中郎將陳留太守皆早卽世夫人哀悼劬悴
由是被疾遭太夫人憂篤年七十七建甯三年
薨夫人之存也契濶中饋婉戀供養依生奉仁
紹述雅意其閏月附于太夫人窀穸于茲地魂
而有靈欽明定省神心欣焉其實甯之元女金

盈追慕永思惜怛罔極遂及斯表鐫著堅珉頌
曰悲母氏之不永懷殷恤以摧傷惟子道之無
窮惜聞誨之未央庶黃耆以期頤胡委我以夙
喪恒思心以激切亦割肝以絕腸昔先聖之遺
辭言仁者其壽長嗟母氏之憂患體愷悌以慈
良失延年之報祐獨何棄於穹蒼日月忽以將
暮抱長結以含愁尋修念於在昔原疾病之所
由遭元子之弱天心傷悴以自憂暨叔季之殞
終哀情結以彌綢皇姑沒而中感遂大漸兮速

流疾燄燄而日邁氣微微以長浮銷精魂以遐
翔曾不可乎援畱爾乃順旨於冥冥繼存意於
不違爰祔靈於皇姑尚魂魄之有依潛幽室之
黯漠惜昭明之景輝一往超以末及傾徂邈其
彌遲顧新廟以累欷伏几筵而增悲嗟旣逝之
益遠耿悠悠而莫追

司徒袁公夫人馬氏靈表

維光和七年司徒袁公夫人馬氏薨其十一月
葬哀子懿達仁達銜恤哀痛靡所寫懷乃撰錄

母氏之德履示公之門人、覩文感義、采石于南山、諮之羣儒、假貞石以書焉、夫人右扶風平陵人也、曾祖中水侯祖將作大匠、考南郡太守中水侯、弟伏波將軍、女在淑媛、作合孝明、誕生孝章、婚姻帝室、世爲名族、夫人生應靈和、德精性妙、角犀豐盈、實有偉表、溫慈惠愛、慎而寡言、幼從師氏、四禮之教、早達窈窕德象之儀、及笄求匹、明哲供治、婦業孝敬、婉孌畢力、中饋後生、仰則以爲模憲、自公歷據王官、至宰相、夫人營克

家道扶翼政事聰明達乎中外隱括及乎無方
不出其機化導宜暢童子無驕逸之光婦妾無
捨力之愆故能窮生人之光寵獲福祿之豐報
朝春政於王室躬桑繭於蠶宮春秋六十有三
寢疾不永懿等追想定省尋思髣髴哀窮念極
不知所裁乃申辭曰
於穆母氏其德孔休思齊先始百行聿修宣慈
惠和恩澤並周義方之訓如川之流俾我小子
蒙昧以漈不享遐年以永春秋往而不返潛淪

大幽嗚呼哀哉凡筵虛設幃帳空陳品物猶在
不見其人魂氣飄飄焉所安神兄弟何依姊妹
何親號咷忉怛曾不我聞吁嗟上天何辜而然
傷逝不續往者不旋

誄

濟北相崔君夫人誄

維延熹四年故濟北相崔夫人卒，嗚呼哀哉！世喪母儀，宗殞憲師，哀哀孝子，靡所瞻依。凡百赴弔，至止增悲。投涕歔歔，共叙赫姿，乃爲誄曰：清和有鑠，時惟哲母，令儀令色，爰以資始。塞淵其心，淑慎其止，于母斯勤，在于斯敏。仰覽篇籍，俯鑒絲枲，多才多藝，于何不有。休譽邈焉，允女之英，乃及崔君，惟德是行，其德伊何？實粹實明。

虔恭事幾契。閤中饋敦此婉順。疾彼攸遂。思齊
徽音。晨興夜寢。穆穆其猷。莫之與二。天祚明德。
底之方穀。於赫崔君。膺茲祉祿。夫人有肩翼。此
清淑仁風。溫潤義惠。優渥推恩。中外施浹。疏族
食不兼膳。服不織縠。以儉爲榮。以奢爲辱。堂堂
其肩。惟世之良。於其令母。受茲義方。訓以柔和。
董以嚴剛。怒不傷愛。喜不亂莊。納之軌度。終然
允臧。是用登躋。享其寵光。雖則崇盛。猶匪甯息。
同其婦子。茂師其職。服貴無荒。尊不舍力。密勿

不忘。惟德之極。昔在共姜。陪臣之母。勞謙紡績。
仲尼是紀。矧茲夫人。帝室命婦。猶日孜孜。復禮
克已。人亦有言。仁者壽長。宜登永年。黃耆無疆。
昊天不弔。降此殘殃。寢疾彌留。精爽倅傷。慘怛
孝子。惴惴其惶。靡神不舉。無藥不將。嗚呼哀哉。
於是孝子長叫。氣絕復蘇。號呼告哀。不知其辜。
昊天上帝。忍弔遺孤。尋想遊靈。焉識所徂。嗚呼
哀哉。旣殯神柩。薄言于歸。冢宰喪儀。循禮無遺。
切切喪主。瘠羸哀哀。情兮長慕。涕兮無晞。行旅

揮涕千里于咨，乃謀卜筮，言考其良，建彼兆域。
于時翳藏，冥冥窀穸，無時有陽，燈燭旣滅，馬道
納光，形影不見，定省何望，嗟其哀矣，不可弭忘。
日月代序，古有如喪，由斯夫人，榮烈有章，配彼
哲彥，旣隆且昌，顧景赫奕，饋供孔將，惟以慰懷，
庶無永傷，嗚呼哀哉。

神誥

漢交趾都尉胡夫人黃氏神誥

夫人江陵黃氏之季女，字曰列羸，其先出自伯翳，別封于黃，以國氏焉。高祖父汝南太守曾祖父延城大尹祖父番禺令，父以主簿嘗證太守事。奉明君以立臣節。漢南之士，以爲美談。初都尉君娶于故豫州刺史卽黃君之姊，生太傅安樂侯廣及卷令康而卒，繼室以夫人生童紀，未齒而夭。夫人懷聖善之姿，韜慈母之仁，撫育二

孤導以義方、思齊先姑、神罔時恫、故能迄用有
成、誕膺繁祉、廣歷五卿七公、再封之祿、康亦由
孝廉宰牧二城、九鼎之義、夫人是享、爰暨稚孫
更仕三宮、或典百里、或作虎臣、銀艾貂蟬、近侍
顯尊、受茲介福、于我夫人、自郡尉仕于京師、及
廣兄弟式叙漢朝、夫人居京師六十有餘載、其
乘輅執贄朝皇后、採桑于蠶宮、手三盆于蘭
館者、蓋三十年、上有帝室寵光之休、下有堂宇
斤斤之祚、心耽其榮、體安其遠、圖長慮迥、用遺

舊居欲畱此焉。康甯之時。亟以爲言。太夫人年
九十一。建寧二年。薨于太傅府。是月辛酉。公之
季子陳畱太守碩卒于洛陽左池里舍。公銜哀
悼。祇慎其屬。遵奉遺意。不敢失墜。乃俾元孫顯
咨度羣儒。以考其衷。僉曰。昔帝舜沒于蒼梧。殯
于虞郊。二妃薨于江湖。不卽兆于九疑。延陵季
子。實惟吳人。長子道終。卜葬嬴博。夫。遭時而制。
不遠遷徙。魂氣所之。不繫邱壠。帝舜以之。神罔
時怨。季札以之。仲尼嘉焉。鑒帝籍之高論。綜精

靈之幽情。稽先人之遐迹。順母氏之所甯。茲事
體通而義同。允不可替。於是公乃爲辭。昭告先
考。然後卜定宅兆。龜筮悉從。遂營窆窆之事。舉
封樹之禮。十月旣望。粵翌日巳酉。葬我夫人黃
氏及陳畱太守碩于此高原。雒陽東界關亭之
阿。天子使中常侍謁者李納弔且送葬。持賻錢
二十萬。布二百疋。再以中牢祠羣后。畢會榮哀。
孔備于時。濟陽故吏舊民中常侍勾陽于肅等
二十三人。思應慕化。推本議銘。著斯碑石。俾諸

昆裔瞻仰以知禮之用是爲神誥乃申頌曰
於穆夫人家邦之媛昔在嬴代黃國氏建至于
近祖亦降于漢天祚明德福祿流衍旣作母儀
履信思順登壽耄耄用永蕃變子孫以仁追稽
先典厝茲洛濱齊跡湘靈配名古人休矣耀光
千億斯年

于益取

於此而思遠者為想則應謂其言人所共知也

與此而思遠者為想則應謂其言人所共知也

與此而思遠者為想則應謂其言人所共知也

與此而思遠者為想則應謂其言人所共知也

與此而思遠者為想則應謂其言人所共知也

哀讚

議郎胡公夫人哀讚

議郎夫人趙氏字曰永姜允有令德秉心塞淵
舒詳閒雅儀節孔備女師四典窈窕德象罔不
習熟以供婦道議郎早世檢誨幼孤義方以導
其性中禁以閑其情孤顯儉節用免咎誨少辟
侍中襲先公之爵以議郎出爲濟陰太守是時
夫人寢疾未薨而國家方有滎陽寇賊震驚帝
師簡選州辟授任進衛不得辭王命親醫藥夫

人乃自矜精稟氣力。俛起若愈。以勸遣顥到官。月餘。所疾暴盛。春秋五十八。中平四年薨于京師。顥有剖符之寄。偪于國典。疾篤不得顧親。增感氣絕。不能自宥。慎終之事。闕焉永廢。雖不毀以隨沒。亦困悴而傷懷。知我如此。不如勿生。號咷告哀。以乞骸骨。踰年然後獲聽。追惟考君存時之命。迎棺舊土。同穴此城。孤心摧割。靡所底念。仰瞻二親。或有神誥。靈表之文。敢曰亮闇。叙我憂痛。作哀讚書之于碑。

愍予小子，夙罹孔艱。嚴考殞沒，我在齠年。母氏鞠育，載矜載憐。殷斯勤斯，慈愛備存。匪惟驕之，範我軌度。教誨嚴肅，昭示好惡。俾我克類，畏威忌怒。用免咎悔，踐繼先祖。卽爵其土，二將是臨。與帝剖符，守于濟陰。夫人寢疾，榮此寵休。疾用歡痊，翊日斯瘳。將征將邁，從養陶丘。景命徂逝，不愍少畱。疾大漸以危，亟兮精微微而浸衰。逼王職於憲典兮，子孫忽以替違。目不臨此氣絕兮，手不親夫含飯。陳衣衾而不省兮，合綆棺而

不見昔予考之卽世兮安宅兆于舊邦依存意
以奉亡兮遷靈柩而同來考妣痛以慘兮離乖
神柩集而移兮增哀黃壚密而無間兮出入閭
其無門昇柩在茲兮不知魂景之所存悼孤衷
之不遂兮思情僚以傷肝幽情淪于后坤兮精
哀達乎昊乾

祝辭

遷都告廟文

嗣曾孫皇帝某敢昭告于皇祖高皇帝各以后
配昔受命京師都于長安享國十有一世歷年
二百一十載遭王莽之亂宗廟墮壞世祖復帝
祚遷都洛陽以服土中享國一十一世歷年一
百六十五載予末小子遭家不造早統洪業奉
嗣無疆關東吏民敢行稱亂總連州縣擁兵聚
衆以圖叛逆震驚王師命將征服股肱大臣推

皇天之命、以已行之事、遷都舊京、昔周德缺而
斯干作、應運變通、自古有之。於是乃以三月丁
亥、來自雒、越三月丁巳、至于長安、飭躬不慎、寢
疾旬日、賴祖宗之靈、以獲有瘳、吉旦齊宿、敢用
潔牲一元、大武柔毛、剛鬣商祭、明視薌合、嘉蔬
香蕕、醎醢豐本、明粢醴酒、用告遷來、尚饗、

九祝辭

高皇帝使工祝承致多福、無疆于爾嗣曾孫皇
帝、使爾受祿于天、宜此舊都、萬國和同、兆民康

又眉壽萬年子子孫孫永守民庶勿替引之

祝社文

元正令午時惟嘉良乾坤交泰太簇運陽乃祀
社靈以祈福祥

祖餞祝文

今歲淑月日吉時良爽應孔加君當遷行神龜
吉兆林氣煌煌著卦利貞天見三光鸞鳴雍雍
四牡彭彭君旣升輿道路開張風伯雨師洒道
中央陽遂求福蚩尤辟兵倉龍夾轂白虎扶行

朱雀道引、立武作侶、勾陳居中、厭伏四方、往臨
邦國、長樂無疆、

禋文

洋洋暮春、厥日除巳、尊卑煙鶩、惟女與士、自求
百福、在洛之矣、

弔文

弔屈原文

鵲鳩軒翥、鸞鳳挫翮、啄碎琬琰、竇其瓴甌、皇車
犇而失轄、執轡忽而不顧、卒壞覆而不振、顧抱
石其何補、

蔡中郎集

卷之二

文

篆勢

字畫之始。因於鳥跡。蒼頡循聖。作則制文。體有
六篆。巧妙入神。或象龜文。或比龍鱗。紆體放尾。
長趯短身。頽若黍稷之垂穎。蘊若蟲蛇之焚緼。
揚波振擊。鷹峙鳥震。延頸脅翼。勢欲凌雲。或輕
舉內投。微本濃末。若絕若連。似露緣絲。凝垂下
端。從者如懸。衡者如編。抄者邪趣。不方不圓。若
行若飛。岐岐翾音喧翾飛貌。遠而望之。若鴻鵠羣。

遊絡繹遷延。迫而視之。端際不可得見。指揮不
可勝原。研桑不能數其詰屈。離婁不能覩其隙
間。般倕揖讓而辭巧。籀誦拱手而韜翰。處篇籍
之首目。粲粲彬彬。其可觀。摘華豔於純素。爲學
藝之範圍。嘉文德之弘懿。蘊作者之莫刊。思字
體之俯仰。舉大畧而論旃。古文苑起句云鳥遺
跡。皇頡循。聖作則。制
斯文體有六。篆爲真。形要妙。巧入
神。或龜文斜列。櫛比龍鱗。餘同。

隸勢

鳥跡之變。乃惟佐隸。蠲彼繁文。崇此簡易。厥用

既宏。體象有度。負若星陳。鬱若雲布。其大徑尋。
細不容髮。隨事從宜。靡有常制。或穹窿恢廓。或
櫛比鍼列。或砥平繩直。或蜿蜒繆戾。或長邪角
趣。或規旋矩折。修短相副。異體同勢。奮筆輕舉。
離而不絕。纖波濃點。錯落其間。若鐘簴設張。庭
燎飛煙。嶄嵒崔嵬。高下屬連。似崇臺重宇。層雲
冠山。遠而望之。若飛龍在天。近而察之。心亂目
眩。竒姿譎誕。不可勝原。研桑所不能計。宰賜所
不能言。何草篆之足算。而斯文之未宣。豈體大

之難覩，將秘與之不傳。聊俯仰而詳觀，舉大畧而論旃。

九惟文

九惟困乏，憂心殷殷。天之生我，星宿值貧。六極之厄，獨遭斯勤。居處浮漚，無以自存。冬日栗栗，上下同雲。無衣無褐，何以自溫。六月徂暑，炎赫來臻。無絺無綌，何以蔽身。無食不飽，永離歡欣。

詩

飲馬長城窟行

青青河畔草。綿綿思遠道。遠道不可思。宿昔夢
見之。夢見在我傍。忽覺在他鄉。他鄉各異縣。展
轉不可見。枯桑知天風。海水知天寒。入門各自
媚。誰肯相爲言。客從遠方來。遺我雙鯉魚。呼童
烹鯉魚。中有尺素書。長跪讀素書。書中竟何如。
上言加餐食。下言長相憶。

答對元式詩

伊余有行，爰戾茲邦。先進博學，同類率從。濟濟羣彥，如雲如龍。君子博文，貽我德音。辭之集矣，穆如清風。

答卜元嗣詩

斌斌碩人，貽我以文。辱此休辭，非余所希。敢不酬答，賦誦以歸。

翠鳥

庭陬

一作前

有若樗，綠葉含丹榮。翠鳥時來集，振

翼脩形容。回顧生碧色，動搖揚標青。幸脫虞人

機得親君子庭。馴心托君素雌雄保百齡。

卷中郎集

卷二

七

本傳

蔡邕字伯喈、陳畱圉人也、六世祖勲、好黃老、平帝時爲郿令、王莽初授以厭戎連率、勲對印綬仰天歎曰、吾策名漢室、死歸其正、昔曾子不受季孫之賜、況可事二姓哉、遂攜將家屬逃入深山、與鮑宣、卓茂等、同不仕新室、父校亦有清白行、諡曰貞定公、邕性篤孝、母常滯病三年、邕自非寒暑節變、未嘗解襟帶、不寢寐者七旬、母卒廬于塚側、動靜以禮、有兔馴擾其室傍、又木生

連理、遠近奇之、多往觀焉、與叔父從弟同居、三世不分財、鄉黨高其義、少博學、師事太傅胡廣、好辭章、數術、天文、妙操音律、桓帝時、中常侍徐璜、左悺等、五侯擅恣、聞邕善鼓琴、遂白天子、敕陳畱太守督促發遣、邕不得已、行到偃師、稱疾而歸、閒居翫古、不交當世、感東方朔客難、及揚雄班固崔駰之徒、設疑以自通、乃斟酌群言、騷其是而矯其非、作釋誨以戒厲云爾、建甯三年、辟司徒橋玄府、玄甚敬待之、出補河平長、召拜

郎中、校書東觀、遷議郎、邕以經籍去聖久遠、文字多謬、俗儒穿鑿、疑誤後學、熹平四年、乃與五官中郎將堂谿典、光祿大夫楊賜、諫議大夫馬日磾、議郎張馴、韓說、太史令單颺等、奏求正定、六經文字、靈帝許之、邕乃自書丹於碑、使工鐫刻、立於太學門外、於是後儒晚學、咸取正焉、及碑始立、其觀視及摹寫者、車乘日千餘兩、填塞街陌、初朝議以州郡相黨、人情比周、乃制婚姻之家、及兩州人士、不得對相監臨、至是復有三

互法、禁忌、轉密、選用艱難、幽冀二州久缺不補、邕上疏、書奏不省、初帝好學、自造皇義篇五十章、因引諸生能爲文賦者、本頗以經學相招、後諸爲尺牘及工書、鳥篆者、皆加引召、遂至數十人、侍中祭酒樂松賈護多引無行趣勢之徒、並待制鴻都門下、熹陳方俗間里小事、帝甚悅之、待以不次之位、又市賈小民爲宜陵孝子者、復數十人、悉除爲郎中、太子舍人、時頻有雷霆疾風、傷樹拔木、地震隕雹、蝗蟲之害、又鮮卑犯境、

役賦及民六年七月制書引咎誥羣臣各陳政
要所當施行邕上封事書奏帝乃親迎氣北郊
及行辟雍之禮又詔宣陵孝子爲舍人者悉改
爲丞尉焉光和元年遂置鴻都門學畫孔子及
七十二弟子像其諸生皆敕州郡三公舉用辟
召或出爲刺史太守入爲尚書侍中乃有封侯
賜爵者士君子皆恥與爲列焉時妖異數見人
相驚擾其年七月詔召邕與光祿大夫楊賜諫
議大夫馬日磾議郎張華太史令單颺詣金商

門引入崇德殿，使中常侍曹節、王甫就問災異及消改變故所宜施行。邕悉心以對，事在五行、天文志。又特詔問曰：「比災變互生，未知厥咎。朝廷焦心，載懷恐懼。每訪羣公卿士庶聞忠言而各存括囊，莫肯盡心，以邕經學深奧，故密特稽問。宜披露失得，指陳政要，勿有依違。自生疑諱，具對經術。」以阜囊封上。邕對章奏，帝覽而歎息，因起更衣。曹節於後竊視之，悉宜語左右。事遂漏露，其爲邕所裁黜者，皆側目思報。初，邕與司

徒劉邵素不相平，叔父衛尉質又與將作大匠楊球有隙。球，郎中常侍程璜女夫也。璜遂使人飛章言邕質數以私事請託於邵，邵不聽。邕含隱切志，欲相中，於是詔下尚書，召邕詰狀。邕上書自陳，於是下邕質於洛陽獄，劾以仇怨奉公議害大臣，大不敬，棄市。事奏，中常侍呂強愍邕無罪，請之。帝亦更思其章，有詔減死一等。與家屬髡鉗，徙朔方，不得以赦。令除楊球使客追路刺邕，客感其義，皆莫爲用。球又賂其部主使加

毒害所賂者反以其情戒邕。故每得免焉。居五
原安陽縣。邕前在東觀與盧植韓說等撰補後
漢記。會遭事流離不及得成。因上書自陳奏其
所著十志。分別首目。連置章左。帝嘉其才高。會
明年大赦。乃宥邕。還本郡。邕自徙及歸。凡九月
焉。將就還路。五原太守王智餞之。酒酣。智起舞
屬邕。邕不爲報。智者中常侍王甫弟也。素貴驕
慙於賓客。詬邕曰。徒敢輕我。邕拂衣而去。智銜
之。密告邕怨於囚放。謗訕朝廷。內寵惡之。邕慮

卒不免。乃亡命江海，遠跡吳會。往來依太山羊氏，積十二年在吳。吳人有燒桐以爨者，邕聞火烈之聲，知其良木，因請而裁爲琴，果有美音。而其尾猶焦，故時人名曰焦尾琴焉。初邕在陳留也，其鄰人有以酒食召邕者，比往而主以酣焉。客有彈琴於屏，邕至門試潛聽之，曰：「喜以樂召我而有殺心，何也？」遂反，將命者告主人曰：「蔡君向來至門而去。」邕素爲邦鄉所宗，主人遽自追而問其故，邕具以告，莫不慙然。彈琴者曰：「我向

鼓琴見螳螂方向鳴蟬蟬將去而未飛螳螂爲之一前一卻吾心聳然惟恐螳螂之失之也此豈爲殺心而形於聲者乎邕莞然而笑曰此足以當之矣中平六年靈帝崩董卓爲司空聞邕名高辟之稱疾不就卓大怒詈曰我力能族人蔡邕遂偃蹇者不旋踵矣又切敕州郡舉邕詣府邕不得已到署祭酒甚見敬重舉高第補侍御史又轉侍書御史遷尚書三日之間周歷三臺遷巴郡太守復留爲侍中初平元年拜左中

郎將從獻帝遷都長安封高陽鄉侯董卓賓客
部曲議欲尊卓比太公稱尚父卓謀之於邕邕
曰太公輔周受命翦商故特爲其號今明公威
德誠爲巍巍然比之尚父愚意以爲未可宜須
關東平定車駕還反舊京然後議之卓從其言
初平二年六月地震卓以問邕邕對曰地動者
陰盛侵陽臣下踰制之所致也前春郊天公奉
引車駕乘金華青蓋爪畫兩轡遠近以爲非宜
卓於是改乘皂蓋車卓重邕才學厚相遇待每

集讌輒令邕鼓琴贊事邕亦每存匡益然卓多
自很用邕恨其言少從謂從弟谷曰董公性剛
而遂非終難濟也吾欲東奔兖州若道遠難達
且遯逃山東以待之何如谷曰君狀異恒人每
行觀者盈集以此自匿不亦難乎邕乃止及卓
被誅邕在司徒王允坐殊不意言之而歎有動
於色允勃然叱之曰董卓國之大賊幾傾漢室
君爲王臣所宜同忿而懷其私遇以忘大節今
天誅有罪而反相傷痛豈不共爲逆哉卽收付

廷尉治罪。邕陳辭謝。乞黥首。刖足。繼成漢史。士大夫多矜救之。不能得。太尉馬日磾馳往謂允曰。伯喈曠世逸才。多識漢事。當續成後史。爲一代大典。且忠孝素著。而所坐無名。誅之無乃失人望乎。允曰。昔武帝不殺司馬遷。使作謗書。流於後世。方今國祚中衰。神器不固。不可令佞臣執筆。在幼主左右。旣無益聖德。復使吾黨蒙其訕議。日磾退而告人曰。王公其不長世乎。善人國之紀也。制作國之典也。滅紀廢典。其能久乎。

邕遂死獄中、允悔欲止而不及時、年六十一、搢紳諸儒莫不流涕、北海鄭玄聞而歎曰、漢世之事、誰與正之。兗州陳畱聞皆畫像而頌焉、其撰集漢事、未見錄以繼後史、適作靈紀及十志、又補諸列傳四十二篇、因李傕之亂、湮沒多不存、所著詩賦碑誄銘讚連珠箴弔論議獨斷勸學釋誨敘樂女訓篆勢祝文章表書記凡百四篇傳於世、論曰、意氣之感、士所不能忘也、流極之運、有生

所共深悲也。當伯喈抱鉗扭。徙幽裔。仰日月而
不見照燭。臨風塵而不得經過。其意豈及語平
日倖全人哉。及解刑衣。竄甌越。潛舟江壑。不知
其遠捷步深林。尚苦不密。但願北首舊邱。歸骸
先塋。又可得乎。董卓一旦入朝。辟書先下。分明
枉結。信宿三遷。匡導既申。狂僭屢革。資同人之
先號。得北叟之後福。屬其慶者。夫豈無懷。君子
斷刑。尚或爲之不舉。况國憲倉卒。慮不先圖。矜
情變容。而罰同邪黨。執政乃追怨子長。謗書流

後。放此爲戮。未或聞之典刑。

贊曰。邕實慕靜。心精辭綺。斥言金商。南徂北徙。
籍梁懷董。名澆身毀。

蔡中郎集卷二終

